


Chê dai 27 di Fevrâr e je une zornade particulâr, stant che e je l'inovâl de Joibe Grasse dal 1511, il riviel popolâr che al sclopà a Udin e che si slargjâ inte plui part de Patrie. Al è un fat storic une vore impuartant, parcè che al è un dai tancj moments là che il popul furlan al à mostrât dignitât, personalitât e cussience di se, in particulâr pe difese dai "dirits antic" des comunitâts rurâls. Par chel, di passe dîs agns, par iniziative di Radio Onde Furlane, chê ricorence e je diventade la Zornade furlane dai dirits.

Ancje chest an, cun chê di memoreâ la "Zornade", juste sabide ai 27 di Fevrâr, la "radio libare dai furlans" e met dongje une programazion di pueste, cun intervistis, aprofondiments tematics, testimoniancis, leturis e rubrichis specificis. Il prin apontament al è a nûf a matine cuntune pontade speciâl di *Dret e Ledrôs*, par cure di **Mauro Missana**, là che si fevelarà des mobilitazions e des resistencis teritoriâls, ambientâls e linguistichis dal Friûl, cui intervents di **Massimo Morettuzzo**, **Diego Navarria**, **Lorenzo Fabbro**, **Aldevis Tibaldi** e **Mario Anzil**. Vie pe buinore - e po in repliche sot sere a tacâ di cinc e mieze - a saran ancje *Babêl Europe*, la rubriche su musiche, dirits e minorancis par cure di **Marco Stolfo**, e lis convesazions cun **Giorgio**

Sabide ai 27 di Fevrâr Radio Onde Furlane e met dongje une programazion di pueste, cun intervistis, aprofondiments tematics, leturis e testimoniancis.



Une zornade sui dirits in Friûl

Cavallo e **Adrian Cescje** che a fevelaran dai lôr libris *Ripensare la nazione* e *Memories di politiche linguistiche*.

DIRITS IN MUSICHE

I dirits in musiche a saran tra i protagoniscj dal dopodimsdi, cu lis selezions musicâls di **Carli Pup** (*Irrintzi*, a misdi e mieç) e di **Leo Virgili** (a trê e mieze), e po ancje de

serade cu la edizion speciâl di *Indigo*, cun **Francis** e **Adrianus**. Cun di plui a trê e larà in onde la leture storiche de Joibe Grasse par cure di **Barbara Minen** e di cuatri e mieze **Carli Pup** e **Pauli Cantarut** a fevelaran dai dirits linguistics dai slovens e dai todescs dal Friûl cun **Antonio Banchig** e cun **Alfredo Sandrini**.



alessandro.digiusto@ifriuli.it

■ MUSEU ETNOGRAFIC

Tieris antighis, peraulis incjantadis

Tescj di lei e di scoltâ, ilustrazions di cjâlâ e di gjoldi e storiis di discuverzi e di tornâ a contâ. Dut chest si cjate drenti di "Tieris Antighis, Peraulis Incjantadis", proget editorîal, metût adun de associazion "Lenghis dal Drac - Amîs di Onde Furlane" cul jutori de Arlef, al vignarà presentât martars il Prin di Març a cinc sot sere li dal Museu etnografic di Udin, in Borc di Greçan, inte suaze di "Par furlan ator par Udin", il program di events e di iniziativis par cure dal Sportel comunâl pe lenghe furlane.

Plui in detai i libruçs di "Tieris Antighis, Peraulis Incjantadis" a vignaran presentâts de bande dai siei curadôrs, **Carli Pup**, **Guido Carrara** e **Lussia di Uanis**, cul coordinament di **Marco Stolfo** di "Furlan in Comun". La partecipazion e je libare e sore nuie.

SCOLTADIS DI DRIUS


President

O soi stât nomenât tunc comission comunâl. L'unic incompetent o jeri jo. Mi àn fat president.



Lis ultimis publicazions di pre Beline

VENÇON. Al continue il cicli dai "Incuintris di Vençon", lis conferencis organizadis di Glesie Furlanis a Vençon. Il secont apontament al è dedicât ae leterature, intal specific aes ultimis publicazions che a jentrin inte Opera Omnia di pre **Antoni Beline**, che chest an al varès finît 75 agns. Al sarà **Angelo Floramo** domenie ai 28 di Fevrâr aes 15 a Vençon, dopo cjantâts i Gjespui in Domo, a presentâ



"La tribù di Levi-vitis di predis", opare postume e inedite di pre Beline, finanziade de Regjon Autonome Friûl - Vignesie Julie e de Fondazione Crup.

Dopo il clamorôs e discutût "La fabriche dai predis", probabilmentri il libri plui cognossût e contestât di pre Beline, l'Autôr al racuei episodis e storiis di vite dai predis, il "prodot de fabriche", e lu fâs

cul stîl e la verve che di simpri a àn caracterizât la sô produzion leterarie.

Inte stesse ocasion al sarà presentât un altri volum de Opera Omnia di pre Beline, finanziât ancje chel cun contribût regionâl: il sest volum de racuelte di "Cirint lis olmis di Diu n. 6", i articui che l'Autôr al à publicât su "La Vita Cattolica". Par restâ inzornâts su la ativitât di Glesie Furlanis si pues consultâ il sît www.glesiefurlane.org o la fanpage www.facebook.com/glesiefurlane.